



Broj : 10/E-11- 4154 /25
Sarajevo: 25-12-2025 godine

Na osnovu člana 45. stav (5) tačka c) Zakona o javnim nabavkama („Službeni glasnik BiH“, broj 39/14, 59/22 i 50/24) – u daljem tekstu: Zakon, člana 69. Statuta Općine Centar Sarajevo – Prečišćeni tekst (»Službene novine Kantona Sarajevo«, br. 23/04), u skladu sa Inicijativom Službe za stambene i komunalne poslove broj: 03-19-7042/25 od 16.12.2025. godine, a na prijedlog Kabineta općinskog načelnika – Odsjeka za javne nabavke, Opštinski načelnik d o n o s i :

O D L U K U

o isključenju iz učešća u postupcima javnih nabavki na period od 12 mjeseci

Član 1.

Isključuje se iz učešća u postupcima javnih nabavki koje provodi Općina Centar Sarajevo (u daljem tekstu: Ugovorni organ), ponuđač **„ADO TRANS“ d.o.o. Visoko, sa sjedištem u ulici Očazi bb 71300 Visoko**, na period od 12 (dvanaest) mjeseci, počev od dana stupanja na snagu ove Odluke.

Član 2.

Razlog isključenja iz člana 1. ove Odluke su utvrđeni značajni nedostaci tokom provođenja prethodnih javnih ugovora, čija je posljedica bila prijevremeni raskid prethodnih ugovora.

Član 3.

Ponuda isključenog ponuđača neće biti uzeta u razmatranje u svim narednim postupcima javnih nabavki koje će provoditi Ugovorni organ, a sve do isteka roka od 12 mjeseci od dana stupanja na snagu ove Odluke.

Član 4.

Ponuđač „ADO TRANS“ d.o.o. Visoko može u roku od 5 dana od dana prijema ove Odluke, u skladu sa članom 45. stav (7) Zakona o javnim nabavkama („Službeni glasnik BiH“, broj 39/14, 59/22 i 50/24), ugovornom organu dostaviti dokaze o mjerama koje je poduzeo kako bi dokazao svoju pouzdanost, bez obzira na postojanje relevantne osnove za isključenje.

Član 5.

Ova Odluka odluka stupa na snagu danom donošenja, a primjenjuje se od dana njene pravosnažnosti.

Član 6.

Ova Odluka objavit će se na web stranici Ugovornog organa, istovremeno sa upućivanjem iste isključenom ponuđaču iz člana 1. Odluke.

O b r a z l o ž e n j e

Na osnovu provedenih postupaka javne nabavke za izvođenje radova na sanaciji, rekonstrukciji, izgradnji i redovnom održavanju cesta za potrebe Općine Centar Sarajevo, za područje MZ: Soukbunar, Skenderija-Podtekija, Trg oslobođenja-Centar, Marijin Dvor i Crni Vrh-Gorica za 2024. godinu, kao i javne nabavke za izvođenje radova na sanaciji, rekonstrukciji, izgradnji, redovnom i vanrednom održavanju cesta LOT 2 za područje MZ: Park-Višnjik, Breka, Koševo II, Pionirska dolina, Nahorevo, izabran je kao napovoljniji ponuđač **„ADO TRANS“ d.o.o. Visoko, sa sjedištem u ulici Očazi bb 7., 71300 Visoko.**

Sa navedenim ponuđačem su zaključeni okvirni sporazumi na period od dvije godine. (I okvirni sporazum broj: 03-11-158/24 od 10.01.2024. godine zaključen je na period od 10.01.2024. godine do 10.01.2026. godine);

(II okvirni sporazum broj: 03-11-3545/25 od 16.05.2025. godine zaključen je na period od 16.05.2025. godine do 16.05.2027. godine).

Prvim okvirnim sporazumom broj: 03-11-158/24 od 10.01.2024. godine o izvođenju radova na sanaciji, rekonstrukciji, izgradnji i redovnom održavanju cesta za potrebe Općine Centar Sarajevo, za područje MZ: Soukbunar, Skenderija-Podtekija, Trg oslobođenja-Centar, Marijin Dvor i Crni Vrh-Gorica, planirana je sanacija više ulica na području navedenim mjesnih zajednica, u skladu sa usvojenim budžetom Općine Centar Sarajevo za 2024. godinu. Nakon potpisivanja okvirnog sporazuma, nadležna služba je zahtijevala od ponuđača „ADO TRANS“ d.o.o. Visoko da izvrši obilazak određenih lokacija, te nakon obilaska da dostavi ponude za ugovaranje radova. Ponuđač „ADO TRANS“ d.o.o. Visoko niti je izvršio traženi obilazak lokacija niti je dostavio ponude za iste. Dana 17.04.2024. godine ponuđač „ADO TRANS“ d.o.o. Visoko dostavio je Ugovornom organu pismenu obavijest da je prošlo više od 90 dana od dana zaključenja okvirnog sporazuma, da zbog ranije preuzetih obaveza i naknadno potpisanih ugovora na osnovu kojih je već započeo izvođenje radova, **nije u mogućnosti organizovati izvođenje radova na području Općine Centar Sarajevo.**

Ugovorni organ je zbog gore navedenih razloga ne izvođenja radova po okvirnom sporazumu, prinuđena ponovno raspisati postupak javne nabavke putem otvorenog postupka za iste radove, imajući u vidu da će postupak trajati duži vremenski period. Ovakvim ponašanjem ponuđača „ADO TRANS“ d.o.o. Visoko, Ugovorni organ izgubio veći dio građevinske sezone, te nema mogućnost realizacije planiranih aktivnosti predviđenih budžetom za 2024. godinu.

Drugim okvirnim sporazumom broj: 03-11-3545/25 od 16.05.2025. godine o izvođenju radova na sanaciji, rekonstrukciji, izgradnji, redovnom i vanrednom održavanju cesta LOT 2 za područje MZ: Park-Višnjik, Breka, Koševo II, Pionirska dolina, Nahorevo, planirana je aktivnost na sanaciji određenih lokacija.

Naime, tokom mjeseca juna 2025. godine na zahtjev nadležne službe od ponuđača „ADO TRANS“ d.o.o. Visoko dostavljene su tri ponude, koje su bile osnov za ugovaranje, odnosno za zaključenje pojedinačnih ugovora za realizaciju. Nadležna služba je pripremila tri ugovora u skladu sa ponudama koje je dostavio ponuđač „ADO TRANS“ d.o.o. Visoko i to: Ugovor I (ophodnja cesta), Ugovor II (asfaltiranje makadamskog puta Usjel) i Ugovor III (sanacija puta Vranića brijeg). Ugovor I (ophodnja cesta) nikada nije zaključen. Ugovor II je zaključen 20.06.2025. godine i ti su radovi završeni. Međutim, Ugovorni organ je putem nadležne službe održao više sastanaka sa predstavnicima izvođača radova, te zahtijevao od izvođača radova „ADO TRANS“ d.o.o. Visoko da se potpiše Ugovor III. Ugovor III je potpisan od strane Ugovornog organa te dostavljen izvođaču radova „ADO TRANS“ d.o.o. Visoko na potpis dana 04.07.2025. godine.

Nakon više urgencija, pismenim i usmenim putem, Ugovorni organ je dana 17.09.2025. godine poslao obavijest izvođaču radova „ADO TRANS“ d.o.o. Visoko o raskidu okvirnog sporazuma.

Na osnovu gore navedenih činjenica, nadležna služba je dostavila inicijativu dana 16.12.2025. godine kojom se zahtijeva isključenje ponuđača/izvođača „ADO TRANS“ d.o.o. Visoko iz postupaka javnih nabavki (sa svim dokazima u prilogu).

Razmatrajući sve dostavljene dokaze koje je nadležna služba dostavila kao razloge isključenja ponuđača/izvođača „ADO TRANS“ d.o.o. Visoko iz postupaka javnih nabavki, Kabinet općinskog načelnika – Odsjek za javne nabavke predlaže Opštinskom načelniku da se prihvati inicijativa nadležne službe.

Ponuđač/izvođač „ADO TRANS“ d.o.o. Visoko kao izabrani ponuđač u postupku javne nabavke iz 2023. godine, odustao je od potpisanog okvirnog sporazuma (u postupku javne nabavke učestvovala su još dva ponuđača), dok je drugi okvirni sporazum iz 2025. godine je raskinut zbog neizvršavanja obaveza na zahtjev Ugovornog organa (u postupku javne nabavke učestvovala još dva ponuđača).

Naime, izvođač radova „ADO TRANS“ d.o.o. Visoko je:

- svojim postupanjem prouzrokovao nemogućnost implementacije planiranih aktivnosti Ugovornog organa za period od potpisivanja okvirnog sporazuma u naredne dvije godine i to nakon provedena dva različita (odvojena) postupka javne nabavke;
- svojim postupanjem je prouzrokovao nepovratne troškove u angažovanju resursa Ugovornog organa na predugovornim i postugovornim aktivnostima;
- svojim postupanjem je prouzrokovao neutrošak planiranih budžetskih sredstava za planiranje aktivnosti, a koje se odnose na budžet 2024. i 2025. godine;
- svojim postupanjem je prouzrokovao nove troškove u angažovanje resursa Ugovornog organa na ponavljanju postupka javne nabavke tokom narednog budžetskog perioda;
- svojim postupanjem doveo u neravnopravan položaj sve ostale učesnike koji su učestvovali u postupcima javnih nabavki, jer je u trenutku izbora morao ili mogao znati da neće moći realizovati sve planirane aktivnosti po potpisanim okvirnim sporazumima;
- svojim postupanjem doveo je Ugovorni organ u nezavidan položaj, jer potpisivanjem okvirnih sporazuma onemogućio je dodjelu istih drugorangiranim ponuđačima.

Imajući u vidu sve navedeno, Ugovorni organ utvrdio je, da je ponuđač „ADO TRANS“ d.o.o. Visoko svojim (ne) djelovanjem demonstrirao izostanak temeljnog poslovnog integriteta, dopustivši da se ne izvršavanjem realizacije zaključenih okvirnih sporazuma i pojedinačnih ugovora prouzrokuju nesagledive štetne posljedice.

Navedeno ponašanje ponuđača, u skladu sa članom 45. stav (5) tačka c) Zakona o javnim nabavkama („Službeni glasnik BiH“, broj 39/14, 59/22 i 50/24), predstavlja osnov za isključenje istog iz svih postupaka javnih nabavki na period od 12 mjeseci, računajući od dana stupanja na snagu ove Odluke.

Ponuđač „ADO TRANS“ d.o.o. Visoko može u roku od 5 dana od dana prijema ove Odluke, u skladu sa članom 45. stav (7) Zakona o javnim nabavkama („Službeni glasnik BiH“, broj 39/14, 59/22 i 50/24), ugovornom organu dostaviti dokaze o mjerama koje je poduzeo kako bi dokazao svoju pouzdanost, bez obzira na postojanje relevantne osnove za isključenje.

Analizom postupaka Ugovornog organa i ponuđača „ADO TRANS“ d.o.o. Visoko jasno i nedvojbeno utvrđene činjenice i okolnosti koje su dovele do isključenja, odlučeno je kao u dispozitivu ove Odluke.

Ova Odluka objavit će se na web stranici Ugovornog organa, istovremeno sa upućivanjem iste isključenom ponuđaču iz člana 1. Odluke.

Pouka o pravnom lijeku:

Protiv ove Odluke može se izjaviti žalba Uredu za razmatranje žalbi putem Ugovornog organa, najkasnije u roku od 5 (pet) dana od dana prijema ove Odluke.



Dostaviti:

1. „ADO TRANS“ d.o.o. Visoko
Ul. Očazi bb, 71 300 Visoko
2. Službi za stambene i komunalne
poslove,
3. Kabinetu općinskog načelnika -
Odsjeku za javne nabavke,
4. Evidenciji

